

կընդունէ բոլոր զօրքերի հրամանատարութիւնը: Ամբողջ Բորչալուի դաւառի մաքրագործման և մինչև Թիֆլիսի նահանգի սահմանները հեռանալու պահանջը անպայման է»:

Իսկ մէկ օր յետոյ, հոկտ. 22-ին, գինւ. նախարար Գէորգաձէն հեռագրեց նոյն Գողուածէին, թէ՛ «քանի որ Հայաստանի ներկայացուցիչ Ջամալեանը իր կառավարութիւնից դեռ չի ստացել մեր դիմումի պատասխանը, հրամայում եմ շտապով գրաւել այն գիծը, որ մենք բռնում էինք թիւրքերի հեռանալուց առաջ և ոչ ոքի թոյլ չտալ անցնելու ո՛չ այդ գիծի այն կողմը, ո՛չ այս կողմը: Մեր զօրքերը դեռ չպէտք է անցնեն այդ գիծը»: Եւ մի լրացուցիչ հեռագրով էլ հրամայեց՝ «առանց վրաց կառավարութեան արտօնութեան Հայաստանից ոչ ոքի թոյլ չտալ մտնելու Վրաստան»:

Այսպէս, ուրեմն, վրաց կառավարութիւնը պատրաստուած էր գէնքի ուժով ստիպելու հայերին, որ դուրս գան Լոռիից՝ վրացիներին յանձնելով և Շահալի կայսրանը: Ի՞նչ է այս, եթէ ոչ պատերազմի որոշում, որովհետև վրաց ղեկավարները չէին կարող չհասկանալ, որ հայերը յօժար կամքով չէին կատարելու իրենց պահանջը: Նրանց թե էր տալիս Գերմանիայի հովանաւորութիւնը: Անշուշտ, նրանք հաւատում էին, որ զինւած բախումի դէպքում, գերմանացիները կը միջամտեն ու կը ստիպեն հայերին կատարել վրացական պահանջը:

Եւ, յիշուի, մինչ Գէորգաձէն պատերազմի պատրաստութիւններ էր տեսնում, Գերմանիայի զինւորական ներկայացուցիչ Ֆոն-Քրեսը աշխատում էր համոզել Հայաստանի ներկայացուցիչ Ջամալեանին ընդունել վրացիներին վերջնագիրը և առանց արիւնհեղութեան դատարկել «վրացական» հողը: Ջամալեանի հարցումին, թէ՛ արդեօք Գերմանիան կը խառնուի՞ հայ-վրացական սահմանային վէճին, Ֆոն-Քրեսը պատասխանեց զրական մտքով. Գերմանիան, որպէս Վրաստանի դաշնակից, պարտաւորւած է պաշտպանել վերջինիս երկիրը այն սահմաններում, ինչ սահմաններում որ ցոյց կը տայ վրաց կառավարութիւնը: Այսպիսով, պարզ էր դառնում վրաց կառավարութեան լայն ախորժակն ու վճռական դիրքը:

Ի՞նչ կարող էին անել այս պայմաններում հայերը:

Վրացիներին վերջնագիրը Երևանում ստացւեց հոկտ. 21-ի գիշերը և անսահման գայրոյթ ու վրդովում առաջ բերեց բոլոր շրջաններում: Հայաստանի Խորհրդի հոկտ. 22-ի նիստում վարչապետ Քաջագնունին արաւ հետևեալ զեկուցումը. —

«Մեր հողի մի մասը, Լոռի-Փամբակի շրջանում, գրաււած էր թիւրքական զօրքերով: Կառավարութիւնը մի քանի անգամ պաշտօնական բողոքներ է ներկայացրել թիւրքաց կառավարութեան, ինչպէս նաև գերմանական և աւստրիական միսիաներին ու գերմանական կառավարութեան և միշտ մի պատասխան է ստացել, որ գրաւումը ժամանակաւոր է: Հոկտեմբեր 5-ին Խալիլ փաշան Երևանում յայտնեց մեզ, որ հրաման է ստացել դատարկել վերոյիշեալ երկրամասերը: Ամբիջապէս մեր և թիւրքաց շտաբները դժեցին այդ գործողութեան ծրագիրը, որը սկսեց հոկտ. 18-ին և առանց որևէ միջադէպի շարունակեց մինչև հոկտ. 21-ը, երբ գիշերւայ ժամը 12-ին հեռագիր ստացանք Գրօից այն մասին, որ «վրացիները վերջնագիր են ներկայացրել՝ դատարկելու համար մեր ստացած շրջանը մինչև Շահալի՝ ու